

SA's Leading Past Year

Exam Paper Portal

STUDY

You have Downloaded, yet Another Great Resource to assist you with your Studies 😊

Thank You for Supporting SA Exam Papers

Your Leading Past Year Exam Paper Resource Portal

Visit us @ www.saexampapers.co.za



SA EXAM
PAPERS



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWEKUCALA LWEKWENGETA (FAL)

LIPHEPHA LEKUCALA (P1)

LWETI 2016

EMAMAKI: 80

SIKHATSI: Ema-awa 2

Leliphepha linemakhasi la-13.

TICONDZISO KULABAHLOLWAKO

1. Leliphepha lehlukaniwe TIGABA LETINTSATFU:
SIGABA A: Sivisiso (30)
SIGABA B: Sifinyeto (10)
SIGABA C: Takhi netimiso tekusetjentiswa kwelulwimi (40)
2. Phendvula YONKHE imibuto ngeSiswati.
3. Cala LESO NALESO SIGABA ekhasini LELISHA.
4. Dwebela ekugcineni kwaleso NALESO SIGABA.
5. Tinombolo tetimphendvulo atihambisane naleto letisephepheni lemibuto njengobe tinjalo.
6. Shiya umugca emkhatsini wetimphendvulo takho.
7. Caphelisisa sipelingi/lupelomagama nendlela lewakha ngayo imisho.
8. Kwehlukaniwa kwesikhatsi:
SIGABA A: Emaminithi 50
SIGABA B: Emaminithi 30
SIGABA C: Emaminithi 40
9. Bhala ngebunono nangesandla lesifundzekako.

SIGABA A: SIVISISO**UMBUTO 1**

1.1 Fundza lethekesthi lelandzelako bese uphendvula imibuto letawulandzela.

ITHEKSTHI A**KUBALULEKA KWEKULALELA IMIYALO YEBATALI**

- | | | |
|---|--|----------------|
| 1 | Mine naTsembani longudzadzewetfu lomkhulu sikhuliswe batali lebebasinika imiyalo lemhle ngaso sonkhe sikhatsi. Bebaye basitjele kutsi bantfwana bafuna kutiphatsa bente lokufunwa ngibo. Bacabange kutsi batali bayabagcilata nangabe babanika imiyalo futsi bentiwa kungaphucuki. Bakhohlwe kutsi indlela ibutwa kulabayatiko. Babewetfu abevele ayibeke ngesihloko kutsi bantfwana basola batali babo nangabe sebahlangene nabontsanga yabo. Kepha nawulandzela letinsolo tabo utawubona kutsi batali benta lokufanele bakwente emntfwaneni wabo kute akhule abe ngumuntfu lokwatiko kumelana nato tonkhe timo temphilo. Tintfo letibatfokotisako bantfwana ngalesinye sikhatsi tishayisana naleto letilindzelwe batali kubo. Kuba mmandzi kubatali nangabe bantfwana bakhombisa inhlonipho nekubalalela etintfweni letinhle naletitabaphumelelisa emphilweni. Kutsiwa umntfwana longalaleli ulihlazo kubatali ngisho nasemmangweni wonkhana. | 5
10
15 |
| 2 | Nembala sengiyabona kutsi bacinisile batali betfu nangabe basinika imiyalo basho nekutsi live liyahlonishwa. Babuye batsi ihlonipha nalapho ingayukwendzela khona. Asubuke nangu dzadzewetfu Tsembani, indlela batali betfu lebebamyala ngayo! Kube walalela ngabe lomuhla akasinje. Bekabonakala angulomuntfu lokhohlwa umyalo lotsi: 'Hlonipha uyihlo nenyoko kute tinsuku takho tandze eveni.' Lomuhla sewehluleka nekuvuka. Baphi labangani bakhe labegijima nabo busuku nemini? Abengabambeki, ashayela etulu futsi angahloniphi muntfu. Imoto lenelivili emuva sacala kuyibona ngaye leyafika nemajaha lamatsatfu ilandze yena nebangani bakhe kulenzawo. Buphi lotjwala lobabugcwala emabhuthini ubatfole sebvulele umsindvo utsi mpu lapha enkhundleni yetemidlalo ngalapha babe banatsa tjwala. Bebatsi bangamemetela emsakatweni kutsi enkhundleni yetemidlalo kunemcimbi lotsite babe babasitile. Batawuchamuka ibhuthi igcwele ngetjwala ngatsi bavele babutsa nje kantsi babutsengile. Leyomoto beyigcina seyiyinkhundla yetibukeli. Ha! Umhlaba uyahlaba! Nje nguye umntfwanamake Tsembani lo? | 20
25
30 |
| 3 | Lokusuke kube buhlungu kakhulu kutsi Tsembani yena wavele washiya phasi sikolo, wabona sengatsi uyabambeleleka ngekuya esikolweni. Bangani bakhe boSindi naPhelele bachubeka nanobe bebaganga nje kodvwa kuyasho kutsi imiyalo yebatali yayingasuki etingcondvweni tabo. Buka nje lomuhla Sindi ungumabhalane lapha emahhovisi akaMasipala, uphila kammandzi uhamba ngemoto yeluhlobo loluphambili. | 35 |

4	Phelele yena usebentela lapha kadokotela Nhlabatsi, yena wemukela tigulane, akufani nekuhlala. Utimele futsi uyakwati kutentela tintfo latitsandzako futsi ugcoke timphahla takanokusho. Tsembani sekumvisa buhlungu nangabe simpheleketela lapha kadokotela kubona lona labengumngani wakhe angasayingeni yakhe. Ute angasafuni nekuya kadokotela waPhelele ngobe nangabe efika khona kugula kumcindzetela ngemandla ate ashaywe naliphika. Akucondzakali kutsi yini imbangela yaloko. Kungenteka kutsi wentiwa kucabanga kakhulu ngelikusasa lakhe lewatibulalela lona nangabe sekabona bangani bakhe baphumelela. BoSindi naPhelele setamile kubakhulumisa ngalesento sabo sekungamnaki umngani wabo kodvwa batsi abanasikhatsi sekumvakashela ngobe bashayisa sekwedlule sikhatsi emsebentini kantsi ngeMigcibelo bayawasha ba-ayine, ngeMasontfo baya etinkonzweni.	40 45 50
5	Emajaha wona akasabonwa nangemehlo ahambile netimoto tawo. Abete kubo ngenhloso letsite. Sewahlala ayedvwa umntfwanamake ngesimanga sekungalaleli. Nangabe tintfo tisakuhambela kahle uba nebangani labanyeti, kodvwa nasetingakuhambeli kahle bangani bayakubalekela.	55

[Itsetfwe encwadzini *Giya Ngigiye*, likhasi 24]

- 1.1.1 Khetsa YINYE imphendvulo. Ngulonjani umntfu longuntsanga yakho? (1)
- A Ngulolingana naye ngemtimba.
B Ngulolingana naye ngebudze.
C Ngulolingana naye ngeminyaka.
D Ngulolingana naye ngemfundvo. (1)
- 1.1.2 Kusho kutsini kutsi indlela ibutwa kulabayatiko? (1)
- 1.1.3 Nguliphi litiko lelisetjentelwa nguPhelele? (1)
- 1.1.4 Yini leyaba buhlungu kakhulu leyentiwa nguTsembani? (1)
- 1.1.5 Nguwuphi umyalo lokuletheksthi lengenhla lophatselene nekutsi nawuwugcina utawuphila sikhatsi lesidze? (2)
- 1.1.6 Ngukuphi lokumnandzi lokutsandvwa batali ebantfwaneni babo? Bhala KUBILI. (2)
- 1.1.7 Bhala tintfo LETIMBILI letikhomba kutsi Tsembani bekangayinakekeli imphilo yakhe. (2)
- 1.1.8 Bhala KUBILI lokucatjangwa bantfwana nangabe batali babanika imiyalo. (2)
- 1.1.9 Bekubangwa yini kutsi Tsembani angafuni kuya kadokotela lapho kusebenta khona Phelele? Bhala KUBILI. (2)

- 1.1.10 Chaza kutsi isho kutsini lenkhulumo letsi: 'Lomuhla sewehluleka nekuvuka?' Bhala emaphuzu LAMABILI. (2)
- 1.1.11 Bhala tintfo LETIMBILI letenta boSindi naPhelele bangamvakasheli Tsembani. (2)
- 1.1.12 Bhala saga lesikuletheksthi lengenhla lesinalenchazelo letsi, hlonipha wonkhe umuntfu ngobe awutati kutsi uyophelelaphi, usho kutsi sibhekiswe kubani. (2)
- 1.1.13 Kungumbono nobe kuliciniso kutsi nangabe tintfo tisakuhambela kahle uba nebangani labanyeti, kodvwa tingakuhambela kabi bangani bayakubalekela? Sekela imphendvulo yakho. (2)
- 1.1.14 Nangabe bewungudzadze waTsembani bewungamcosha yini ngalemphilo lebekayiphila? Sekela imphendvulo yakho. (2)

1.2 Fundzisa lesitfombe bese uphendvula imibuto letawulandzela.

ITHEKSTHI B



[Itsetfwe ku-Bona, Inhlaba 2013, Likhasi 25]

1.2.1 Khetsa KUNYE kuloku lokulandzelako. Nangabe ubuka lomndeni kulesibonwa lesingenhla ukhombisani emphilweni?

- A Ukhombisa kuvelana.
- B Ukhombisa kujabula.
- C Ukhombisa kwekhutana.
- D Ukhombisa kungevani.

(1)

- 1.2.2 Yini lena leyenteka kulesibonwa lesingenhla? (1)
- 1.2.3 Nika KUBILI lokukhombisa kutsi labantfu labakulesibonwa baphila kahle. (2)
- 1.2.4 Loku lokwenteka kulesibonwa kuvame kwenteka kuphi nendzawo ngaphandle kwasekhaya? Bhala KUBILI. (2)

SAMBA SESIGABA A: 30

SIGABA B: SIFINYETO**UMBUTO 2**

Fundza lethekesthi lelandzelako bese ubhala emaphuzu lasikhombisa laveta **kongiwa kwemanti**.

TICONDZISO

1. Bhala emaphuzu LASIKHOMBISA ngemisho legcwele ngemagama LANGENGCI kula-60.
2. Imisho yakho ayibe netinombolo kusuka ku-1 kuya ku-7.
3. Bhala liphuzu LINYE emshweni ngamunye.
4. Sebentisa emagama AKHO.
5. Khombisa linani lemagama lowasebentisile ekugcineni kwesifinyeto uwafake kubakaki.

ITHEKSTHI C**KONGIWA KWEMANTI**

Kongiwa kwemanti kufanele kube yincenye yemphilo yebantfu baseNingizimu Afrika. Somiso sibhokile njengobe imifula seyishe kwasala isanti ngenca yenkinga yekwesweleka kwemanti eveni lakitsi. Tinyenti-ke tintfo letingentiwa bantfu kute babe ngulabo labonga emanti ngalesikhatsi lesimatima kangaka.

Kuhle kugcina libhodlela lemanti labandzako efrijini kute ubalekele kuvula impompi sikhatsi lesidze kutsi emanti aze aphole bese uyanatsa. Manyenti emalitha lalahlekako nangabe uvulela emanti kuze utfole labandzako.

Nangabe umuntfu awasha tindishi, angavuli emanti agelete nakatiyakata. Lokuncono akagcwalise izinki yinye ngemanti ekuwasha bese lenye ufaka emanti ekutiyakata. Ungatfolakali uwasha tindishi ngayinye kodvwa ube uvulele emanti ngebunyenti empompini.

Kumele bantfu batejwayete kuhlola emamitha abo emanti kubona kutsi kute emaphayiphi emanti lavutako. Emaphayiphi ekutselela emanti kubalulekile kutsi avalwe tonkhe tikhala letikhipha emanti. Emavelufu nawo kumele acinisekiswe kutsi akakhiphi emanti ngalokungakafaneli.

Kubalulekile kusebentisa umtsanyelo nangabe uhlanta libala lakho kunekutsi usebentise liphayiphi lemanti. Libala lelinemathayilisi nobe leliphayiphiwe alingatsanyelwa ngeliphayiphi lemanti, kuhle kutsi kusetjentiswe umtsanyelo kususa insila.

Nangabe uwasha imoto yakho, tsela emanti ebhakedeni lelincane uwashe ngawo ite iphelele. Imoto itsatsa emanti lamanyenti kakhulu nangabe utawucala kususa umhlaba ngeliphayiphi lemanti uphindze ukhiphe ngalo insipho. Loko kukwenta usebentise emanti budlabha.

Nawugezela ebhavini, lawo manti ungaphindze uwasebentise kutselela ingadzi yakho netjani. Bakhona labacabanga kutsi kusebentisa emanti logeze ngawo kubulala titjalo.

Ungaphindze uwonge emanti ngekuba nelithangi lekukhangetela emanti emvula longawasebentisa etintfweni letinyenti njengekuwasha timphahla. Nangabe ufake lithange kumele ube nemitsi loyisebentisako kuhlanta lamanti. Loko kutawunciphisa emagciwane langadala kugula.

Kwenta tintfo letingenhla kungasisita sive ekunciphiseni lenkinga lesibukene nayo yekweswelakala kwemanti. Asikhumbule kutsi emanti ayimphilo ngete saphila ngaphandle kwawo.

[Itsetfwe ku-*Isolezwe*, Ingci 2015, Likhasi 5]

SAMBA SESIGABA B: 10

SIGABA C: TAKHI NETIMISO TEKUSETJENTISWA KWELULWIMI**UMBUTO 3: SIKHANGISI**

Fundza lesikhangisi lesingentasi bese uphendvula imibuto letawulandzela.

ITHEKSTHI D

I-TISSUE OIL YENTA SIKHUMBA SISHELELE BUSUKU NEMINI.



The original with sun protection

- ✚ Itsambisa sikhumba lesomile.
- ✚ Yenta sikhumba sibe busheleleti njengesemntfwana.
- ✚ Labasebentisa yona bavuka babe basha sha.
- ✚ Iyasetjentiswa nangulabadvuna nebantfwana.
- ✚ Lilanga alidlaleli kulosebentisa i-Tissue Oil.
- ✚ Awekho emafutsa lengca i-Tissue Oil.

[Itsetfwe ku-True Love, Ingc 2013, Likhasi 11]

- 3.1 Sitsini sihloko salesikhangisi? (1)
- 3.2 Khetsa YINYE imphendvulo. Lenkhulumo letsi, 'Lilanga alidlaleli kulosebentisa i-Tissue Oil' ishoni? (1)
- A Lilanga alikushisi.
 B Lilanga alikulandzeli.
 C Lilanga alikukhanyisi.
 D Lilanga alikuvali.

- 3.3 Khhipha umusho lonenkhumo leyimfundzisolite uwubhale phasi. (1)
- 3.4 Bhala ligama lenkapani leyenta iTissue Oil. (1)
- 3.5 Shano kutsi kungani kusetjentiswe ligama lelitsi, 'kushela' kulesikhangisi. Bhala KUBILI. (2)
- 3.6 Kungani lokhangisako asebantise sicatsaniso imini nebusuku? Bhala KUBILI. (2)
- 3.7 Khhipha sinongo lesisifaniso lesisetjentiswe kulesikhangisi lesingenhla utakhele wakho umusho ngaso. (2)

[10]

UMBUTO 4: IKHATHUNI

Fundza lekhathuni bese uphendvula imibuto letawulandzela.

ITHEKSTHI E[Itsetfwe ku-www.educationalcartoons.co.za]

- 4.1 Khetsa YINYE imphendvulo. Shano kutsi leligama lelidvwetjelwe enkhulumeni 1 lichazani?
A Bantfwana labangenaluvelo.
B Bantfwana labangenamandla.
C Bantfwana labangenabatali.
D Bantfwana labangenabasiti. (1)
- 4.2 Khokha ligama **lelisibaluli** kulomusho longentasi.
'Dlamini, nje uyabacasha yini bantfwana labahluphekako?' (1)
- 4.3 Tsatsa lelibito lelidvwetjelwe enkhulumeni 2 ulibhale ngeSiswati mbamba. (1)
- 4.4 Bhala kutsi lamagama ladvwetjelwe kulomusho longentasi akhombani.
'Yebo, ngiyabacasha Mtungwa lomuhle.' (1)
- 4.5 Mehluko muni lokhona kulamadvodza lamabili ekubambeni tingilazi? (2)
- 4.6 Tsatsa libitombici lelisetjentiswe enkhulumeni 2 wakhe ngalo umusho. (2)
- 4.7 Khokha selulo sesento lelisetjentiswe kuleligama lelidvwetjelwe ngentasi bese usho kutsi sisho kwentani.
'Bangisebentela kahle kakhulu njalo ngemaholide' (2)

[10]**UMBUTO 5: IPHROZI**

- 5.1 Fundza lethekesthi lelandzelako bese uphendvula imibuto letawulandzela.

ITHEKSTHI F**INHLUPHEKO YAKAKHUMALO**

'Ibhasi yaMgubane isendleleni seyigudla intsaba iJambila legcwele tihlahla.' Kukhuluma Siphon emele uyise esiteshini. Emakhata ayababa. Phela Siphon abetfunywe ngunina kuyomela uyise njengobe inyanga iphelile. Khumalo bekasebenta eBhabutini. Ngalesikhatsi Siphon alindzele uyise wabasa umlilo kutewucedza emakhata.

Wakhipha umetjiso walayitha wavutsa umlilo. Chamu ibhasi, kwehla uyise wamhlangabeta. Wambona alengisa tandla angakaphatsi luffo. Lusizi lwakhe lwase lubhalwe ebuntini. Batsi basabukene beva umsindo ephasini. 'Sasha siganga semlumbi.' Bagucuka bonkhe bahlahla emehlo. Siphon wagijima wayewetama kucima umlilo kepha kwangalungi. Kwachamuka umninipulasi wabuta kutsi usukaphi lomlilo. 'Ubaswe ngimi Mnumzane, bengitsi ngiyotsa ngobe ngiva emakhata.' Kuphendvula Siphon ashaywa luvalo. 'Kulungile, bakini batawubhadala kamatima ngalomonakalo. Ngifuna R900,00. Nakungasinjalo utawuhlala ejele.' Kusho umlumbi.

Khumalo wasibona siganga sisha, emehlo akhe agcwala tinyembeti acabanga inhlupheko labukene nayo. Wagcina ngekutsi, 'wangenta Siphon, ngilahlekelwe ngumsebenti, anginamali, angati kutsi sitawuphila ngani'.


[Itsetfwe encwadzini *Umnotfo Welulwimi*, Likhasi 41]

- 5.1.1 Khetsa YINYE imphendvulo. Nika umfutiselo walelibito lelidvvetjelwe kulomusho longentasi.
'... seyigudla intsaba iJambila legcwele tihlahla.'
- A Umganu
B Umcombotsi
C Umbhidvo
D Umkhuhlane (1)
- 5.1.2 Bhala mcondvofana waleligama lelidvvetjelwe kulomusho longentasi.
'Khumalo wasibona siganga sisha.'
(Bhala imphendvulo kuphela.) (1)
- 5.1.3 Lungisa leligama lelidvvetjelwe kulomusho lolandzelako.
Batsi basabukene beva umsindo ebhasini. (1)
- 5.1.4 Kuletheksthi lengehla khokha libitomfakela endzimeni yekucala ulibhale phasi. (1)
- 5.1.5 Endzimeni yesibili khokha umusho lonesentakutsi uwubhale phasi bese uyasidvwebela. (2)
- 5.1.6 Bhala lomusho longentasi ukhombe kuphika.
Khumalo bekasebenta eModise. (2)
- 5.1.7 Sebentisa lesabito lesidvvetjelwe kulomusho longentasi emshweni lotakhele wona.
'Bagucuka bonkhe bahlahla emehlo.' (2)
- 5.1.8 Lungisa ligama lelikubakaki libhaleke kahle kulomusho longentasi.
(Emehlo) akhe kwagcwala tinyembeti. (2)
- 5.1.9 Nika luhlobo lwendlela yesento lolucuketfwe ngulemisho lelandzelako:
(a) Wakhapha umetjiso walayitha.
(b) Kusho umlumbi. (2)

5.2 SITFOMBE

Fundza lesitfombe lesilandzelako bese uphendvula imibuto letawulandzela.

ITHEKSTHI G



[Itsetfwe ku-Move, Ingongoni 2011, Likhasi 18]

5.2.1 Khetsa YINYE imphendvulo. Bhala sinongo lesitfolakala efreyimini 1:

- A Sifanisongco
- B Sihabiso
- C Sifaniso
- D Simuntfutiso

(1)

5.2.2 Tsatsa sihlanganiso efreyimini 3 uhlanganise lemisho lelandzelako.

Bengipheke liphalishi. Ngifuna kudla lona.

(1)

5.2.3 Nika inchazelo yalesisho lesitsi, 'Alishisi likhipha inhlanti emantini.'

(2)

5.2.4 Efreyimini 1 tsatsa sandziso sesikhatsi, 'ekuseni', usisebentise emshweni lotakhele wona.

(2)

[20]

SAMBA SESIGABA C: 40
SAMBA SAKO KONKHE: 80